

西湖志

第八卷
西湖志

西湖志卷之三十三

藝文三

詩 五言古

早春錢塘湖晚眺

唐張祜

落日下林坂撫襟睇前蹤
輕澌流迴浦殘雪明高峯
仰視天宇曠俯登雲樹重
聊當問眞界昨夜西巒鐘

和僧長吉湖居五首

宋范仲淹

湖山

湖山滿清氣賞心甲吳越
晴嵐起片雲晚水連初月
漁

父得意歸歌聲等閑發

水月

千尋月腳寒湖影淨於天
忽如嫦娥宮俯仰見嬋娟
更約中秋夕長津無寸煙

筠亭

爲愛碧鮮亭入夏攸關至
臺榭競生煙獨有清涼意
高岡鳳不來幽人此沉醉

風笛

風引湖邊笛焉知非隱淪
一聲裂雲去明月生精神
無

爲落梅調留寄隴頭人

渚蓮

武林誰家子波面雙雙渡空積心中絲未成機上素似
共織女期秋宵苦霜露

四月八日西湖觀民放生

宋

蔡襄

盈舟載魚蝦投瀉清波際應無校人欺獨行流水惠非
求升斗活終免螻蟻制江湖自相忘洲島亦還逝脫淵
思曩戒喚餌省非計爲生豈不幸萍藻庶可翳

九月十五日觀月聽琴西湖示坐客

宋
蘇軾

白露下秋草碧空卷微雲孤光爲誰來似爲我與君水
天浮四座河漢落酒樽使我冰雪腸不受麴蘖薰尙恨
琴有弦出魚亂湖紋哀絃本舊曲妙耳非昔聞良時失
俯仰此見寧朝昏懸知一生中道眼無由渾

懷西湖寄晁美叔同年

宋
蘇軾

西湖天下景游者無愚賢深淺隨所得誰能識其全嗟
我本狂直早爲世所捐獨專山林樂付與寧非天三百
六十寺幽尋遂窮年所至得其妙心知口難傳至今清

夜夢耳目餘芳鮮君持使者節風采爍雲煙清流與碧
巘安肯爲君妍胡不屏騎從暫借僧榻眠續我壁閒詩
清涼洗煩煎策杖無道路直造意所便應逢古漁父葦
閒自負緣問道若有得買魚勿論錢

杭州遊山

宋 蘇軾

山平村塢迷野寺鐘相答晚陰生林杪落日猶在塔行
招兩社僧共步青山月送客渡石橋迎客出林樾幽尋
本真性往事聽徐說錢王方壯年此邦事輕俠鄉人鄙
貧賤異類識英傑立石像興王遺址今岌業功勳三吳

定富貴四海甲歸來父老藏崇高畏傾壓詩人工譏病
此欲恣挑抉流傳後世人談笑資口舌是非今已矣興
廢何倉卒持歸問禪翁笑指浮漚沒

次韻仲殊雪中遊西湖

宋蘇軾

夜半幽夢覺稍聞竹葦聲起續凍折絃爲鼓一再行曲
終天自明玉樓已崢嶸有懷二三子落筆先飛翼共爲
竹林會身與孤鴻輕秀句出寒餓身窮詩乃亨禪老復
何爲笑指孤煙生我獨念粲者誰與予目成

湖上夜歸

宋蘇軾

我飲不盡器半酣味尤長
籃輿湖上歸春風吹面涼
行到孤山西夜色已蒼蒼
清吟雜夢寐得句旋已忘
尙記梨花村依依聞暗香
入城定何時賓客半在亡
睡眠忽驚矍繁燈鬧河塘
市人拍手笑狀如失林顰
始悟山野姿異趣難自強
人生安爲樂吾策殊未良

九日湖上尋周李二君不見君亦見尋於湖上以

詩見寄明日乃次其韻

宋蘇軾

湖上野芙蓉含思愁脉脉
娟然如靜女不肯傍阡陌
詩人杳未來霜艷冷難宅
君行逐鷗鷺出處浩莫測
葦閒

聞拏音雲表已飛屐使我終日尋逢花不忍摘人生如
朝露要作百年客喟彼終歲勞幸茲一日澤願言竟不
遂人事多乖隔悟此知有命沉憂傷魂魄

五月十日與呂仲甫周邠僧惠勤惠思清順可久

惟肅義詮同泛湖遊北山

宋
蘇軾

三吳雨連月湖水日夜添尋僧去無路潏潏水拍簷駕
言徂北山得與幽人兼清風洗昏翳晚景分濃纖縹緲
朱樓人斜陽半疏簾臨風一揮手悵焉起遐瞻世人驚
朝市獨向溪山廉此樂得有命輕薄神所殲

自徑山回得呂察推詩卽用其韻招之宿湖上

宋
蘇軾

多君貴公子愛山如愛色心隨丹葉去夢遶千山碧新
詩到中路令我喜折屐古來軒冕徒操舍兩悲慄數朝
辭簪笏兩腳得暫赤歸來不入府卻就湖上宅寵辱吾
久忘寧畏官長詰飄然便欲去誰在子思側君能從吾
游出郭及未黑

連日與王忠玉張全翁游西湖訪北山清順道潛
二詩僧登垂雲亭飲參寥泉最後過唐州陳使

君夜飲忠王有詩次韻答之

宋蘇軾

北山非自高千仞付我足西湖亦何有萬象生我目雲
深人在塢風靜響應谷與君皆無心信步行看竹竹閒
逢詩僧眼色奪湖淥百篇成俯仰二老相追逐故應千
頃池養此一雙鵠山高路已斷亭小膝屢促夜尋三尺
井渴飲半甌玉明朝鬧絲管寒食雜歌哭使君坐無聊
狂客來不速載酒有鴟夷叩門非啄木浮蛆灑金盃翠
羽出華屋須臾便陳迹覺夢那可續及君未渡江過我
勤秉燭一笑換人爵百年終鬼錄

和子瞻自徑山回宿湖上

宋蘇轍

朝從徑山來，泱莽徑山色。
暮從湖上歸，滉漾湖光碧。
借問泛湖舟，何似登山屐。
高懷厭朝市，遠去忘憂慄。
目向幽人青，顏從濁醪赤。
塵埃解羅網，宇宙爲安宅。
油然了無營，此意誰能詰。
嗟子別離久，欲往徒反側。
留滯亦何爲，空驚突深黑。

偶游大愚見餘杭明雅照師舊識子瞻能言西湖
舊遊將行賦詩送之

宋蘇轍

五年賣鹽酒勝事不復知
城東古道場蕭瑟寒松姿出

遊誠偶爾相逢亦不期西軒吳越僧弛擔未多時言往
西湖中巖谷涵清漪卻背閭井喧曲盡水石奇昔年蘇
夫子杖履無不之三百六十寺處處題清詩麋鹿盡相
識况乃比邱師辯淨二老人精明吐琉璃笑言每忘去
蒲褐相依隨門人几杖立往往聞談詞風雲一解散變
化何不爲辯入三昧火卵塔長松欹淨老不復出塵尾
清風施蘇公得罪去布衣拂霜髭空存壁閒字鬱屈蟠
蛟螭知我卽兄弟微官此棲遲問何久自苦五斗寧免
飢俯首笑不答且爾聊敖嬉我兄次公狂我復長康癡

反復自爲計定知山中宜但欲畢婚娶每爲故人疑君
歸漫灑掃野鶴非長羈

雨霽行西湖二首

宋程俱

晨暉麗春山雨過松竹香連峯翠欲滴動搖雲水光長
隄如臥虹草暗路已荒菰蒲破綠淨老葑日以長念昔
總角游祗今三毛蒼物境旣非昨我身安得常

半生走三吳問舍如捕風敢辭百尺樓高臥愧元龍向
來江道人卜宅湖山中安知三十年忽作梵王宮蒼雲
翳修竹飛閣凌春空主人兩鬢霜驅車大河東豈念五

畝園方作萬里封而我志幽獨長年美冥鴻翻無容足
地茅茨剪蒿蓬

次韻遊西湖阻雨

宋陳淵

去年賞西湖薄暑攀躋難同游幸勝士酒沃衣巾斑今
歲來錢唐臘雨扁舟寒友朋適四集局蹐樊籠閒此生
分林泉造物猶未慳未爲登岳禱且作訪戴還無私本
天理敢怨陰雲頑向來旱蝗歲征賦何當寬寧令風作
雪要看麥堆山

十日不至湖上

宋周紫芝

我始跨匹馬，蹭蹬來東吳。東吳亦何有，政復爲西湖。
西湖如靜女，婉然真彼姝。湘娥結烟鬟，水鏡涵空虛。
晴光固不惡，雨態亦自殊。窈窕一僧窗，煙雲媚朝晡。
上下數白鳥，飛翻與人娛。只今雨鳴葉，便作波跳珠。
寒窗掛薜蘿，身疑在菰蒲。咫尺不得住，況乃千里餘。
始來梅欲花，旋復春云徂。幸茲少留住，換我西征車。
尙可具小舟，紅粧醉芙渠。

冬至前九日湖水盡冰後二日晚晴小舟循湖心
而歸冰已稍開書是日所見

宋周紫芝

西清志
卷三十三
積雨凝宿陰寒水結湖背鷗鷺不敢前龜魚各潛晦敲
冰得湖心鼓棹作澎湃萬玉朝明堂丁東響環珮誰來
貝闕中小現銀色界夕陽似知人微溫散珠琲爲我開
模糊遙山影空翠境勝不可名語惡聊自悔安得王右
丞萬象歸綵繪遙憐西子寒眉月增點綴

曉行湖隄望南山諸峯

宋
周紫芝

曳履步遠壑挽衣支短筇霽色過急雨餘霞漏微紅照
眼一湖淨環湖幾山重不知何處燈明滅蒼翠藂但聞
煙霞閒繞山鳴亂鐘暮年行樂意不與足力窮明晨儻